

Uunga siunnersuut: Nunaoil A/S pillugu Inatsisartut inatsisaata atorunnaarsinneqarnera pillugu Inatsisartut inatsisaat

(Aatsitassanut Inatsisillu Atuutsinneqarnerannut Naalakkersuisoqarfimmut Naalakkersuisuni ilaasortaq)

Saqqummiussinermut allakkiaq

(Aatsitassanut Inatsisillu Atuutsinneqarnerannut Naalakkersuisoqarfimmut Naalakkersuisuni ilaasortaq)

Siullermeerneqarnera

Naalakkersuisut sinnerlugit matumuuna Nunaoil A/S pillugu Inatsisartut inatsisaata atorunnaarsinneqarnera pillugu Inatsisartut inatsisaannut siunnersuut saqqummiunneqarpoq.

Piffissami matumani Namminersorlutik Oqartussat ikummatissanik akuersissuteqartarneranni peqataasarnermik, aammalu tamatumunnga pissutissamisoortumik atassuteqartuni Kalaallit Nunaata iluani avataanilu suliassanik isumaginnittarnissamik Nunaoil A/S siunertaqarpoq, takuuk Nunaoil A/S pillugu Inatsisartut inatsisaanni § 1.

Nunaoil A/S siusinnerusukkut akiliunneqarluni suleqataasutut ikummatissiassanut akuersissutini peqataasarpoq (aningaasaliinissamik pisussaaffeqarani piginneqataalluni), kisianni maannakkorpiaq akuersissutini ingerlatsivigineqartuni peqataasarunnaarsimavoq.

Kalaallit Nunaannut tamarmut ikummatissiassanut akuersissutinik tunineqarnissamik unitsitsinissaq (neqeroortitsineq) Naalakkersuisut ulloq 24. juni 2021-mi aalajangiuppaat. Taamaalilluni ikummatissiassanut akuersissutinik peqataanissamik siunertaqartup ingerlatseqatigiiffiup attatiinnarnissaanut tunngavissaaruppoq.

Nunaoil A/S pillugu Inatsisartut inatsisaata atorunnaarsinneqarnerata kingunerisaanik Nunaoil A/S ingerlatseqatigiiffiup malittarisassaanni siunertamut aalajangersakkap allanngortinnissaanut periarfissaqalissaaq, taamaalilluni ingerlatseqatigiiffiup ingerlataqarnerni ikummatissiassanut akuersissutinut toqqaannartumik atassuteqanngitsuni suleqataasinnaanissaa periarfissiissutigineqassalluni.

Naggasiutigalugu inatsisissatut siunnersuut tassungalu oqaaseqaatit innersuussutigissavakka.

Taamatut oqaaseqarlunga Naalakkersuisut sinnerlugit siunnersuut Inatsisartunut suliarisassanngortippara.